

42

37

22

準
貴



紀事本末卷之三十二

提督浙江學政僉事豐潤谷應泰編著

男

訂

土木之變

癸亥正統八年夏四月瓦剌太師順寧王脫歡死子

也先嗣自脫歡殺阿魯合併吞諸部勢浸強盛至也

先益橫屢犯塞北邊境自此多事

十二年春正月巡撫宣大僉都御史羅亨信上言瓦

刺也先專候釁端圖入寇宜預于直北要害增置城
衛土城備之不然恐貽大患奏聞兵部尚書鄺埜畏
王振不敢主議時參將石亨欲以大同四州七縣之
民三丁籍一兵又有勅令軍餘盡撥屯種量畝起科
亨信奏言瓦剌方驕邊民疲甚兼以邊地隴薄若如
所言是絕衣食而逼其竄也且當今事勢正宣布恩
信以結人心苟絕其衣食未有得其心者詔從之

十四年春二月也先遣使二千餘人進馬詐稱三千
人王振怒其詐減去馬價使回報遂失和好先是也

先遣人入貢通事輩利其賄告以中國虛實也先求
結婚通事私許之朝廷不知也至是貢馬因此聘禮
也答詔無許姻意也先益媿忿謀寇大同夏六月
丙辰夜雷電大震風雨驟作謹身殿火起延奉天華
蓋工殿奉天諸門皆燬自王振擅權災異叠見振畧
不警畏狠恣愈甚且諱言天變時浙江紹興山移于
平地官不敢聞又地動白毛遍生奏入不省陝西二
處山崩壓沒人家數十戶山移有聲三日不絕移三
里不敢詳奏黃河改往東流于海滄沒人家千餘戶

又振宅新建未踰時一火而盡南京宮殿火是夜大雨殿基上荆棘二尺高始下詔赦天下秋七月也先圖犯邊其勢甚張侍講徐程語其友魏溥曰禍不遠矣亟命妻子南歸皆重遷有難色程怒曰爾不急去不欲作中國婦耶乃行八日也先大舉入寇兵鋒銳甚大同兵失利塞外城堡所至陷沒邊報日至乃遣駙馬都尉并源等四將各率兵萬人出禦之源等既行太監王振勸上親征命下二日即行事出會亭舉朝震駭命太師英國公張輔太師成國公朱勇

師以從戶部尚書王佐兵部尚書鄭埜學士曹鶴張益等扈征吏部尚書王直及大小羣臣伏闕懇留不允十七日命太監金英輔邸王居守每旦于闕左門西面受羣臣謁見遂偕王振奔官軍五十餘萬人至龍虎臺駐營方一鼓衆軍訛相驚亂皆以爲不祥明日出居庸關過懷來至宣府連日風雨人情洶洶聲息愈急隨駕諸臣連上章留振怒悉令掠陣未至大同兵士已乏糧僵屍滿路寇亦佯避誘師深入八月戊申朔至大同振又欲進兵北行鄭埜請回鑾振矯

旨令與王佐隨老營焚乘馬蹀躞而前墜地幾殆王
佐竟日跪伏草中請還欽天監正彭德清斥振曰象
緯示警不可復前若有疎虞陷乘輿于草莽誰執其
咎學士曹鶴曰臣子固不足惜主上係天下安危豈
可輕進振怒曰倘有此亦天命也于是井源等報敗
踵至會暮復有黑雲如繖罩營雷雨大作王振惡之
會前軍西寧侯朱瑛武進伯朱冕全軍覆沒鎮守大
同中官郭敬密言于振勢決不可行振始有還意明
日班師大同總兵郭登告學士曹鶴等車駕入宜從

紫荆關庶保無虞王振不聽振蔚州人因欲邀駕幸
其第既又恐損其禾稼行四十里復轉而東還至狼
山追騎且及十三日庚申遣朱勇等率三萬騎禦之
勇無謀進軍鷓兒嶺敵于山兩翼邀阻夾攻殺掠殆
盡是日駕至土木日尚未晡去懷來僅二十里衆欲
入保懷來以王振輜重千餘兩未至留待之鄜陞再
上章請車駕疾驅入關而嚴兵爲殿不報又請行殿
力請振怒曰腐儒安知兵事再妄言必死陞曰我爲
社稷生靈何得以死懼我振愈怒叱左右扶出遂駐

土木旁無水泉，又當敵衝。十四日辛酉，欲行，敵已逼，不敢動。人馬不飲水已二日，飢渴之甚，掘井深二丈，不得水。其南十五里有河，已爲七先所據。七先分道，自土木傍麻谷口入守口，都指揮郭懋拒戰。終夜，敵益增。時楊洪總兵在宣府，或勸洪急以兵衝敵圍，駕可突出，竟閉城不出。十五日壬戌，敵遣使持書來，以和爲言。遂召曹鶴草勅與和，遣二通事與北使偕去。振急傳令移營踰壘而行，迴旋之間，行伍已亂。南行未三四里，敵復四面攻圍，兵士爭先奔逸，勢不能止。

鐵騎蹂陣而入，奮長刀以砍大軍。大呼解甲投刀者，不殺。衆裸袒相蹈藉死。蔽野寒川，宦侍虎賁，矢被體如蝟。上與親兵乘馬突圍不得出，被擁以去。英國公張輔、尚書鄺埜、王佐、學士曹鼐、門張益而下數百人皆死。從臣得脫者，蕭惟禎、楊善等數人。軍士脫者，踰山陞谷，連日飢餓，僅得達關。騾馬二十餘萬，弁衣甲器械輜重，盡爲七先所得。太監喜寧降于七先，盡以中國虛實告之。初，師既敗，上乃下馬盤膝，面南坐。惟喜寧隨侍，有一胡索衣甲不與，欲加害。其兄來曰：「此非

凡人舉動自別，擁出雷家站見也。先之弟賽刊王上問曰：子其也先乎？其伯顏帖木兒乎？賽刊王乎？大同王乎？聞其語大驚，馳見也先。曰：部下獲一人，甚異，得非大明天子乎？也先乃召使中國二人問：是否？三人見大驚曰：是也也。先喜曰：我常告天求大元一統天下，今果有此勝，問衆何以爲計？其中一人名乃公大言曰：天以仇賜我，不如殺之。伯顏帖木兒大怒呼也先爲那顏，那顏者華言大人也。安用此人在傍，攬其面曰：去。因力言兩軍交戰，人馬必中刀箭，或踐傷壓

死。今大明皇帝獨不踐壓中刀箭，而問那顏問我等，無驚恐怨怒。我等久受大明皇帝厚恩賞，雖天有怒，推而棄之地下，而未嘗死之。我等何反天？那顏若遣使告中國，通返天子，那顏不有萬世好男子名乎？衆皆曰：者，何語云者，然辭也。于是也先以上送伯顏帖木兒營，令護之時，惟校尉袁彬侍命。彬遣前使臣梁貴持手書示懷來守臣，言被留狀。且索金帛，城閉不可入。繼之上守臣遣人送至京，以是夜三更從西長安門入報。十七日百官集闕下，頗聞敗報，私告語驚

懼出朝見敗卒裹創纍纍至訊之皆不知上所在是日皇太后遣使賫重寶文綺載以八騎皇后錢氏盡括宮中物佐之詰也先營請還車駕不報

谷應泰曰古者天子有道守在四裔及其季也保境固圉毋生戎心是故馬邑之誘加罪王恢鄧支之誅靳封延壽蓋以勤兵遠畧輕開邊釁非細故也况乃撐犁之帳甫逼關門而黃屋之尊自爲鎖鑰晉明帝深窺姑孰趙武靈突入咸陽誰實謀國而乃身試不測之淵輕入虎狼之

穴哉若夫英宗踐祚王振擅權也先桀黠狡焉啓疆其時如羅亨信之議備土城石亨之撥軍屯種則先事之防也王直之伏闕懇留鄜莖之堅請回鑾王佐之草間跪伏則臨事之救也而王振威福自擅從來日久銳意親征有進無退豈真楚國聯師滅此朝食驃姚報漢無以家爲者乎乃從來嘖笑竊弄者必須假禦侮以固主恩而勢焰炙手者易于倖邊功以邀富貴此振之所以據鞍顧盼走死地如鶩耳至于千金之

子坐不垂堂。十室之邑。可以免難。而英宗是時。勸駕之言。易入。斷鞅之議。不行者。毋亦文皇自征瓦剌。狃于易與。而宣宗自將待邊。又所親見者耶。以故追戎濟上。專目魯公。北伐令支。羣推小白。然而天時人事。則有異焉。方其天變見于上。地變見于下。南宮荆棘。北殿塵灰。比于梅福之金鐵。皆飛宗周之三川。告亡此何景也。至龍臺而一軍皆亂。出居庸而連宵風雨。薄大同而殭屍滿路。比于符堅之犬嗥。宮門管子之胛鼓。

皆濁此何兆也。逮夫井源敗。屺踵至。朱冕全軍覆沒。而振始還屯。左次定議。班師嗚呼。晚矣。蕩陰之血。酷于染衣。平陽之辱。幾于執蓋。徒使師武臣封尸。俱死諸大夫。菱舍無從。楚三戶之衆。見懷王以何期。銳司徒之妻。嘆吾君之不免。幸而共和行政。叔武入守。適來那顏之怒。不用乃公之謀。則貨匪居秦壁。還入趙矣。不然而皇太后遣賫重寶。錢皇后盡括宮中幣。與地同盡。人與幣俱往。徽欽之禍。復見于茲。雪窖冰天。魂終。

漠北矣。然予嘗論之。寇準饒學術。可以戰。而真
示受盟。王振少方畧。不可以戰。而英宗驟舉。是
則澶淵之會。以重發而喪功。土木之變。又以輕
為。而至敗耳。彼王振倡謀。喜寧反噬。雖一死沙
場。一膏斧鑕。而罪浮罄竹。報不蔽辜。宜乎靖康
誅童貫。而賈生之書。必欲縛中行說。而答其背
也。

紀事本末卷之三十三

浙江提督學政僉事豐潤谷應泰編著

男際科 際第 誦

景帝登極守禦

英宗正統十四年秋八月。上北狩。太后召百官入集
闕下。諭曰。皇帝率六軍親征。已命郕王臨百官。然庶
務久曠。今特敕郕王總其事。群臣其悉啓。王聽令。辛
未。太后詔立皇長子見深為皇太子。時年二歲。命郕

王輔之詔天下曰。邇者寇賊肆虐，毒害生靈。皇帝懼憂宗社，不遑寧處，躬率六師，問罪師徒，不戒被留。王庭神器，不可無主。茲于皇庶子三人，選賢與長，立見深為皇太子，正位東宮。仍命郕王為輔，代總國政，撫安萬姓，布告天下。咸使聞知。癸酉，郕王臨午門，言官大臣次第宣讀彈劾王振啓章，言振傾危宗社，請滅族以安人心。若不奉詔，群臣死不敢退。因哭聲徹中外。王起入內，使將闔門。衆隨擁入，有令旨籍沒振遣。指揮馬順往。衆曰：順振黨也。宜遣都御史陳鎰時太

監金英傳旨，令百官退。衆欲摔毆英，英脫身入馬順從旁叱百官去。給事中王竑憤起，摔順首曰：馬順往時助振惡，今日至此，尚不知懼。衆爭毆之。或就脫順鞵，捶擊躑躅立斃。順衆又索振黨內使毛王二人，英粹令出，亦擊殺之。曳三屍陳東安門，軍士猶爭擊不已。逾時，執振姪錦衣衛指揮王山反接跪于廷。衆唾罵之。于是衆競喧嘩，班行雜亂，無復朝儀。百官既毆殺順，益恟懼不自安。王亦屢起欲退還宮。兵部侍郎于謙直前攬王衣曰：殿平止振罪首，不籍無以泄衆

憤且羣臣心爲社稷耳無他王從之降令旨獎諭百
官歸蒞事馬順罪應死勿論衆拜謝出是日事起倉
卒賴謙鎮定謙排衆翌王入袍袖爲裂旣出吏部尚
書王直者篤老臣執謙手而歎曰朝廷正藉公耳今
日雖百王直何能爲一丙子移王座入奉天門左受
朝陳鑑奉令旨籍振并其黨彭德清等家振第宅數
處壯麗擬宸居器服珍玩尚方不及玉盤徑尺者十
面珊瑚高者七八尺金銀十餘庫馬萬匹皆沒官
鬻山于市族屬無少長皆斬振暨山弟林等皆從駕

死于兵太后命以于謙爲兵部尚書二十三日也
先擁上至大同城下索金幣約賂至卽歸上都督郭
登閉門不納上傳旨曰朕與登有姻婭何外朕若此
登遣人傳奏曰臣奉命守城不敢擅啓閉隨侍校尉
袁彬以頭觸門大呼于是廣寧伯劉安給事中孫祥
知府霍宣同出見獻蟒龍袍上以賜伯顏帖木兒及
也先弟大通漢英王上曰秋稼未收軍士久飢可令
刈以入城又曰也先聲言歸我情僞難測且嚴爲備
從騎叩城下索犒軍資并內官郭敬等金銀共萬餘

兩來迎駕既獻復不應初也先來索賂郭登曰此給
我耳莫若以計伐其謀劫營奪駕入城此爲上策乃
謀以壯士七十餘人餉之食令奮前執其方刀因擁
上還召壯士與之盟激以忠義約事成高爵厚祿士
皆奮躍用命已書券給之會有沮者既淹久寇覺驚
擾而去時登練兵振武誓以死守大同將士咸感奮
屢出奇挫敵故以孤城得全也先擁上道宣府總
兵楊洪閉城門不出事聞逮洪繫詔獄上出塞過猶
兜莊九十海子歷蘇武廟李陵碑二十八日至黑松

林也先營在焉上始入也先營也先拜稽首侍坐設
宴令妻妾出上壽歌舞爲樂仍奉上居伯顏帖木兒
營去也先營十餘里伯顏帖木兒與其妻見上亦如
也先禮也先屢欲謀害會夜大雷雨震歿也先所乘
馬謀乃沮且加禮焉袁彬侍左右頗知書性警敏又
有哈銘者先隨使臣吳良羈留在北至是亦與彬同
侍又有衛沙狐狸者亦隨上至漠北供薪水勞苦備
至王二十九日太后遣太監金英傳旨皇太子幼冲
卿王宜早正大位以安國家時議者以時方多故人

心危疑思得長君以弭禍亂于是文武群臣交章勸進王再辭讓衆請遵太后命允之遂擇日行禮九
月戊寅朔上在迤北也先遣使來言欲送上還京師使還以金百兩銀二百兩綵幣二百匹賜也先癸未
郝王即皇帝位遙尊上爲太上皇詔赦天下改明年爲景泰元年也先復遣使致書辭悖慢兵部尚書
于謙見帝泣言曰寇賊不道勢將長驅深入不可不預爲計邇者各營精銳盡遣隨征軍資器械十不存一宜急遣官分設召募官舍餘丁義勇起集附近民

夫更替沿河漕運官軍令其悉隸神機等營操練聽用仍令工部齊集物料內外局廠晝夜併工成造攻戰器具京師九門宜用都督孫鏜衛穎等給領兵士出城守護列營操練以振軍威選給事中御史如王竑等分出巡視勿致疎虞徙郭外居民于城內隨地安插毋爲寇掠通州壩上倉糧不可捐棄以資寇令在官者悉詣關支准爲月糧之數庶幾兩得帝嘉納之
以兵部郎中羅通給事中孫祥並爲副都御史分守居庸紫荆等關以薛瑄爲大理寺丞分守北門

命侍講徐理楊鼎檢討王詢等行監察御史事分鎮河南山東等處要地撫安軍民令各處招募民壯就令本地官司率領操練遇警調用 起楊洪石亨于詔獄命洪仍守宣府亨總京師兵馬亨有威望方面鉅軀鬚垂至膝先協守萬全坐不救乘輿械繫詔獄至是以于謙言赦出之使總京營兵馬贖罪 十月也先以送上皇還京爲名與可汗脫脫不花寇紫荆關京師戒嚴先是太監喜寧故韃靼也土木之敗降于也先盡以中國虛寔告之爲彼嚮道奉上皇入寇

七日至大同城下守臣郭登曰賴天地祖宗之靈國有君矣也先知有備不攻去九日至廣昌破紫荆關殺指揮韓濟等都御史孫祥走歿朝野洶洶人無固志赦交趾敗績論成山侯王通爲都督陞鴻臚寺卿楊善爲副都御史協守京城太監興安問王通計將安出通以挑築京師外城濠爲計興安鄙之侍講徐理方有時名亦銳意功業太監金英召徐理問計理曰驗之星象曆數天命已去請幸南京英叱之令人扶出明日于謙上疏抗言京師天下根本宗廟社

穆陵寢百官萬姓帑藏倉儲咸在若一動則大勢盡去宋南渡之事可鑒也。理安言當斬太監金英。宣言于衆曰：死則君臣同死，有以遷都為言者，上命必誅之。乃出榜告諭固守之議。始決謙聞寇迫關，思各處芻粟數萬計，恐為敵資，急遣使焚之。然後奏聞，或請姑待報。謙曰：寇在目前，若少緩，彼將據之，適以齎盜糧耳。獨不見宋牛駝崗事乎？衆皆是之。已卯，先長驅至京城西北關外，命石亨等軍于城北，兵部尚書于謙督其軍，都督孫德軍于城西，刑部侍郎江淵

參其軍，皆背城而陣，以交趾舊將王通為都督，與御史楊善守城。時衆論戰守不一，主將石亨欲盡閉九門，堅壁以避賊鋒。謙曰：不可。賊張甚矣，而我又先弱，是愈張也。乃率先士卒，躬擐甲胄，出營德勝門以示必死。泣以忠義諭三軍，人人感奮，勇氣百倍。尚寶司丞夏瑄陳四策，一謂寇多騎，長于野戰，短于攻城，且堅壁勿戰，使之氣沮，然後出奇設伏，諸道奮擊，一謂寇深入，宜令死士夜襲其營，設伏內地，以待追者，一謂寇既舉國入犯，邊無所禦，宜分邊兵內外夾攻，彼

將自潰一謂我軍依城爲營退有所歸宜以三隊爲法前隊戰退令中隊悉斬以殉不斬者同罪使士知畏法詔趨行之喜寧嗾也先遣使來議和索大臣出迎駕衆莫敢出乃以通政叅議王復爲禮部侍郎中書舍人趙榮爲鴻臚寺卿出朝上皇于土城廟也先伯顏帖木兒擐甲持弓矢侍上皇復等見上皇進書敕上皇視漢字書也先視番字敕也先日爾皆小官急令王直胡濙于謙石亨來上皇諭復榮曰彼無善意汝等宜急去二人辭歸寇益四出剽掠焚三陵殿

寢祭器逼宣武門南逾蘆溝橋散掠下邑攻城益急石亨折弓厲聲曰宰臣不出計莫能支矣大學士陳循等疏請敕宣府遼東總兵楊洪曹義各選勁騎與官軍夾擊又請旨募斬也先者賞萬金封國公復僞作喜寧與太監典安書云約誘也先入寇欲乘其孤軍取之書爲也先邏卒所獲也先頗疑喜寧旣而宣府遼東兵至軍大振時諸軍二十二萬列城下寇見大軍盛而嚴不敢輕犯以數騎來嘗謙設伏空屋遣騎誘之遂以萬騎來薄伏發敗之石亨出安定門與

其從子彪持巨斧突入中堅所向披靡敵却而西亨
追戰城西復却而南彪率精兵千人誘寇至彰義門
寇見彪兵少逼之亨率衆乘之寇敗走神機營都督
范廣以飛鎗火箭殺傷甚衆都督孫鏗禦寇西直門
失利諸將不相援鏗急叩門求入給事中程信監軍
西城言鏗小失利卽開門納鏗賊益張人心益危乃
閉城趨鏗戰寇逼城鏗兵走死地亦附城戰信與都
督王通都御史楊善城上鼓譟鎗砲佐鏗毛福壽高
禮往援禮中流矢石亨兵亦至乃引退于是也先知

我有備氣稍沮于謙使諜諜知上皇移駕遂命石亨
等夜舉火大砲擊其營次者萬人也先以上皇北遁
脫脫不花聞之遂不敢入關亦遁也先出居庸關伯
顏帖木兒奉上皇出紫荆關諸將分兵躡其後石亨
與從子彪復破寇于清風店孫鏗楊洪范廣逐寇至
固安又捷奪回人口萬餘時寇騎散掠各郡不過百
餘騎驅人畜以自衛望之若萬衆然猶殺官軍數百
人洪子俊幾爲所獲上皇出紫荆關連日雨雪乘馬
踏雪而行上下艱難遇險則袁彬執控哈銘亦隨之

既入寇營也先來見宰馬拔刀割肉燎以進云勿憂終當送還食訖辭去脫脫不花遣使來獻馬議和朝廷却之胡濙王直曰脫脫不花也先君臣素不睦宜受其獻以間之從其言使人入見賜衣服酒饌金帛協守大同都督郭登議率所部并糾集義勇從雁門入援先以蠟書馳奏大畧謂戎馬南驅三關失險留連內地爲患非輕欲悉起各處官軍民壯入護內廷京兵擊于內臣兵擊于外使賊有腹背受敵之虞首尾不救之患且曰忠誠切已敢忘報國之心成

敗在天不負爲臣之節以賊退優詔褒答之時我師屢劄邊陲無完地大同兵士戰沒之餘城門盡閉人心土崩有愛登者泣謂之曰事已至此奈何登曰天若祚國必無他憂若敵勢莫過吾與此城誓相存亡當不使諸君獨歿也大同孤危登氣益壯弔次問傷親爲痛恤晝夜籌慮修城繕兵以圖後舉尋京師圍解登上疏言寇騎雖回離邊不遠傳報有云黃河已凍且向延綏青草復生再侵京闕事雖未信備必先修乞推誠待下側席求賢明理克欲以成聖學親賢

遠佞以收人望。既又傳也。先將復犯京師，登以京兵新選，不可輕戰。又疏曰：今日之計，可以養銳，不可浪戰。可以用智，不可鬪勇。兵法知彼知己，可守則守，其涑水、易州、真定、保定一帶皆堅壁清野。京兵分據犄角，安營以逸待勞，以主待客，勿求僥倖。務在萬全，此謂不戰而屈人兵，善之善者也。命都指揮董寬率兵督河間、濟陽等衛緝捕盜賊。時降人安置畿內者，乘時並起爲盜。十一月，以寇退京城解嚴，降詔撫安天下。楊洪等班師還京，論功封楊洪昌平侯，石亨

武清侯。加于謙少保、總督軍務。謙固辭不許，有誦謙功者，輒謝曰：四郊多壘，卿大夫之恥。今但不城下盟，何功也？學士陳循疏言：守居庸副都御史羅通曉暢軍事，宜召還守宣府。總兵楊洪及子俊皆善戰，宜留之京師。于謙曰：宣府京師之藩籬，居庸京師之門戶。邊備旣虛，萬一先乘虛據宣府，爲巢窟，京師能安枕乎？兵科給事中葉盛亦上言：今日之事，邊關爲急。往者馬營、獨石，不棄則六師何以陷；土木、紫荆、白羊，不破則寇騎何以薄都城。卽此而觀，邊關不固則京

城雖守不過僅保九門其如寢陵何其如郊社壇壝何其如四郊生靈荼毒何宜急令固守爲便先是土木旣敗邊城多陷宣府孤危旣而復召宣府總兵入衛京師人心益懼或欲遂棄宣府紛然就道都御史羅亨信不可仗劔坐當門拒之下令曰敢有出城者必斬衆始定城中老稚歎呼曰吾屬生矣因設策捍禦督將士誓死守寇知有備不敢攻至是上從于謙葉盛言乃以左都督朱謙佩印鎮宣府紀廣楊俊副之僉都王竑鎮居庸上皇北至小黃河蘇武廟伯顏

帖不兒妻阿撻刺阿哈刺侍女設帳迎駕羊羴杯進膳尋值聖節七先上壽進蟒衣貂裘進宴哈銘袁彬常宿御寢傍天寒甚每夜上皇令彬以兩脇溫足一日晨起謂銘曰汝知乎汝夜手壓我胸我俟汝醒乃下手因言光武與子陵共臥事銘頓首上皇夜出帳房仰觀天象指示二人曰天意有在我終當歸也上皇使哈銘致意伯顏妻令勸伯顏送還朝妻曰我婦人何能爲然官人洗濯我侍巾脫亦當進一言伯顏嘗因獵得一雉并酒一卮來獻銘時時設喻慰

上皇勿憂或成疾。時乜先聲言欲送上皇還，衆遂多主和于謙。獨排衆議曰：社稷爲重，君爲輕。遣人申戒各邊將，毋墮賊計。命尚書石璞鎮守宣府，都御史沈固鎮守大同，都督王通守天壽山，僉都御史王竑城昌平，都御史鄒來學提督京都軍務，平江伯陳豫守臨清，副都御史羅通守山西。

景帝景泰元年春正月，上皇書至，索大臣來迎，命公卿集議。廷臣因奏請遣官使北賀節，進冬衣。上謂必能識太上皇帝者始可行。群臣懼謝罪，事遂寢。大

同總兵郭登敗寇于栲栳山，寇入大同境。登率兵攝之行七十里，至水頭。日暮，休兵。夜二鼓，有報云：東西沙窩賊營十二，皆自朔州掠回。登召諸將問計，或言賊衆我寡，莫若全軍而還。登曰：我軍去城百里，一思退避，人馬疲倦，賊以鐵騎來追，卽欲自全，得乎？按劍起曰：敢言退者，斬徑薄賊營。天漸明，賊以數百騎迎戰。登奮勇先登，諸軍繼進，呼聲震山谷。登射中二人，手刃一人，遂大破其衆，追奔四十餘里。至栲栳山，斬首二百餘，奪還人馬器械萬計。進封定襄伯，食祿千

一百石與世券是役也登以八百騎破寇數千爲一時戰功第一登爲將智勇善撫士卒紀律嚴明料敵制勝動合機宜在大同與賊相拒一年大小數十戰未曾挫衄常恨馬少步卒追賊不及乃以已意設爲夾地龍飛天網鑿爲深塹覆以土木人馬通行如履平地賊入圍中令人發機自相擊撞頃刻十餘里皆陷又用砲石擊賊一發五百餘步人馬死者數十賊傳以爲神云時也先分調各部擾邊朱謙敗之于宣府杜忠敗之于偏頭關王翱敗之于遼東馬昂敗之

于甘州脩城堡簡精銳各邊皆有備石亨佩大將軍印巡邊石彪楊俊亦間出中國勢遂振 閏正月叛人小田兒伏誅小田兒爲也先鄉導雜使中來瞞虛實于謙授計侍郎王禕就大同道誅之 二月叛臣喜寧伏誅寧懷二心教也先擾邊且不欲送上皇還上皇深惡之寧又忌袁彬誘彬出營將殺之上皇急救之乃免彬與上皇謀遣寧傳命入京令軍士高磐與俱密書繫磐髀間令至宣府與總兵等官計擒之既至宣府叅將楊俊出與寧飲城下磐抱寧大呼俊

縱兵遂縛寧送京誅之也先聞寧誅與賽刊王等分道入犯三月也先賽刊王寇大同陽和大同王寇偏頭關答兒不花王寇亂柴溝鐵哥不花王寇大同八里店鐵哥平章寇天城脫脫不花王寇野狐嶺并萬全夏四月甲戌戶部尚書金濂等議寇騎犯邊大軍失利遣有馬營獨石龍門鵬鶚等處芻糧宜令督儲侍郎劉璉提督軍務副都御史羅通及宣府總兵朱謙遊擊楊能會計從運宣府從之都督楊俊請大舉出塞大同宣府列營堅守爲正兵獨石偏頭

乘間設伏爲奇兵悉發京營與諸鎮兵出塞逐北而犁其王庭可以得志于謙曰報仇雪恥臣等職也顧興兵舉事係社稷安危卽如俊所言萬一我軍出塞賊以偏師綴我而別遣部落間道乘虛入寇是自撤藩籬非萬全計臣愚未見其可上從謙議大同叅將許貴請遣使贖幣以款寇兵而徐爲討伐計于謙曰前者固非不遣使都指揮季鐸指揮岳謙遣而寇騎已至關口通政王復少卿趙榮進而不獲徵太上信其狡焉侮我而齧我何似而可言和况也先不

共戴天仇也。理固不可和。萬一和而彼遂肆無厭之求。從之則坐弊不從則生變勢。亦不可和。貴介冑之臣而委靡退怯。法當誅。是時上任謙方專疏。既入于。是邊將人人言戰守也。先不得挾重相恫喝。抱空名不義之質。始謀歸太上矣。諜報也。先逼總兵朱謙于關子口。明日復報追石亨于雁門。關烽火連屬。衆皆恐。請大發兵援之。于謙策也。先大隊尚遠。塞必張疑兵以脅我。乃上方畧授石亨使皆堅壁。而令各營秣馬厲士。若將大舉者。仍遣延綏總兵帥騎渡河。于

保德州設伏截殺。從之。已而賊果不至。于謙以畿輔諸州郡兵力單甚。乃皆宿兵。奏遣都指揮陳旺石端王信王竑等分屯涿鹿真定保定易州諸處。而以右都督楊俊帥焉。久之皆屹然重鎮。五月乙巳。巡撫山西都御史朱鑑奏也。先分道入寇。請令關隘守將盡地救援。寇犯河曲保德苛嵐。宜令偏頭關策應。犯寧化靜樂忻州定襄太原清源交城文水。宜令山西策應。犯五臺繁峙崞縣。宜令雁門關策應。其石州寧鄉宜令汾州守備分兵協守。從之。武清侯石亨奏

寇騎六萬圍代州官軍出戰有斬獲又分營雁門關一路恐侵京師下廷臣議黃花鎮鞞口外衛西北邊境內護陵寢京師宜益兵守備從之仍令兵部稽在京軍馬數以聞寇騎犯宣府總兵都督朱謙等率兵力戰却之官軍陣亡者百四十人都督江福等兵應援不利殺傷百餘人兵部言通事馬雲馬青先奉使迤北許乜先細樂伎女又許與中國結婚皆出自指揮吳良致開邊釁請寘諸法詔下錦衣衛鞠之立京圍營操法初太宗以北虜故宿重兵燕中會承

平久不能無老弱公侯中貴人往往役占去本之難精銳畧盡雖有五軍神機三千諸營然不相統一每遇調遣號令紛更兵將不相識于謙上言兵冗不練遇敵輒敗額四十餘萬非盡可用者徒費大家米于是卽諸營選馬步驍悍者十五萬分爲十營每營各以都督領之五千人爲一小營營以都指揮領之團操以備警急是爲圍營而以謙總督列侯石亨楊洪柳溥爲總兵太監曹吉祥劉永誠等監之餘步騎仍歸三大營曰老營自是兵將相識每出征卽令原營

都督領之故號令歸一洪亨皆老將宿獵而亨尤貪縱謙威令嚴審目視指屈口奏悉合機宜亨等雖爲大帥進止賞罰一由謙相顧頹首而已戮左都督楊俊俊楊洪子也恃勇桀驁不可馴先備獨石馬營等土木之變棄城逃歸馬營龍門等八城皆不守旣而命爲叅將帥兵巡哨懷來等處復輒調永寧守備官軍于懷來將永寧城西曰砌塞于謙劾其方命專權擅作威福詔宥不問俊又以私怒都指揮陶忠棧撻死父洪懼禍奏取俊還京隨營操練旣至謙併劾

其獨石棄城喪師辱國及懷來私仇撻死邊將之罪謂非誅俊無以懲戒將來兵科給事中葉盛等亦劾之于是逮繫法司議罪斬于市阿刺遣使貢馬請和邊臣留之懷來以聞是時韃靼政事也先專之兵最多脫脫不花雖爲可汗兵少知院阿刺兵又少君臣鼎立外親內忌其合兵南侵利多歸也先而弊則均受及也先欲和恥屈意陰使阿刺等來言于是禮部會議請遣太常少卿許彬錦衣都指揮同知馬政譯來使情偽彬等言也先果欲議和罷兵且奉還上

皇奏至帝問尚書學士陳循曰先可和耶循曰遣而備之上曰然乃降璽書厚賜阿剌數也先挾詐義不可從卽阿剌必欲和好待瓦剌諸部落北歸議和未晚不然朕不惜戰也六月吏部尚書王直等言也先遣使請上皇還京蓋上下神祇陰誘其衷使之悔悟伏望皇上許其自新遣使臣前去審察誠僞如果至誠特賜俯納奉迎上皇以歸不復事天臨民陛下但當盡崇奉之禮庶天倫厚而天眷益隆上曰卿言甚當然此大位非我所欲蓋天地禮宗宗室文武

群臣之所爲也自大兄蒙塵朕累遣內外官員贖金帛迎請也先挾詐不肯聽若又使人往恐假以送駕爲名羈留我使率衆來犯京畿愈加蒼生之患卿等更加詳之勿遺後患上皇駕至大同先是也先入寇聲言選戰馬奉上皇南歸是日至大同定襄伯郭登設計于城月門裹具朝服以候潛令人伏城上俟上皇入卽下城闌板既及門寇覺之遂擁上皇退去武清侯石亨言雁門關一帶山口雖已築塞賊猶漫山徑過須斷其半山可行之處京城四面宜築墩

臺以便瞭望署都督僉事劉鑑言京師與懷來止隔一山請自懷來築烟墩直至京師土城遇事舉火以報從之秋七月也先屢以和議不成復俾其知樞密院阿剌爲書遣叅政完者脫歡等五人至京師請和禮部議尚書胡濙等奏奉迎上皇帝不允次日帝御文華殿召文武群臣論曰朝廷因通和壞事欲與寇絕而卿等屢以爲言何也吏部尚書王直對曰上皇蒙塵理宜迎復乞必遣使勿使有他日悔帝不懌曰我非貪此位而卿等強樹焉今復作紛紜何衆不

知所對于謙從容曰大位已定孰敢他議荅使者冀以舒邊患得爲備耳帝意始釋曰從汝從汝言已卽退羣臣出文華門太監興安傳呼曰孰堪使者有文天祥富弼乎衆未荅王直面赤勵聲曰是何言臣等惟皇上使誰敢勿行者安語塞入復時李實任禮科都給事中帝命興安傳旨欲遣之對曰實不才然朝廷多事安敢辭興安入復命遂以李實爲禮部右侍郎充正使羅綺爲大理寺少卿充副使馬顯授指揮使爲通事上御左順門召實等面諭曰爾等見脫脫

不花也先立言有體上遣書脫脫不花可汗曰我國
 家與可汗自祖宗來和好往來意甚厚往年奸臣滅
 使臣賞遂失大義遮留朕兄今各邊奏報可汗尚留
 塞上殺掠人民朕欲命將出師念彼此人民上天赤
 子可汗殺朕人朕亦殺可汗人與自殺何異朕不敢
 恃中國之大人民之衆輕于戰鬪恐逆天也近得阿
 刺使奏言已將各路軍馬約束回營是有畏天之意
 深合朕心特遣使齎書幣達可汗其益體朕意副天
 心復降璽書諭也先及阿刺遺可汗也先阿刺白金

文綺時閣臣及府部諸臣承上意止言息兵講和不
 及迎復上皇意實等遂偕完者脫歡行以十七日至
 也先營地名失八禿兒既見也先讀璽書畢乃引見
 上皇上皇居伯顏帖木兒營所居氊毳帳服食飲皆
 羶酪牛車一乘為移營之具左右惟校尉袁彬暨哈
 銘侍實等見上皇泣上皇亦泣上皇曰朕非為遊畋
 而出所以陷此者王振也因問太后皇上皇后俱無
 恙又問二三大臣上皇曰曾將有衣服否實等對曰
 往使至皆不得見天顏故此行但擬通問未將有也

實等乃私以所有糗餌常服獻上皇曰此亦細故但與我國大事也先欲歸我卿歸報朝廷善圖之儻得歸願爲黔首守祖宗陵墓足矣言已俱泣下實等因問上居此亦思舊所享錦衣玉食否又問何以寵王振至此致亾國上皇曰朕不能燭姦然振未敗時羣臣無肯言者今日皆歸罪于我日暮實等歸宿也先營酌酒相待也先伯顏貂裘胡帽其妻珠緋覆面垂肩盃酪盂肉更互彈琵琶吹笳兒按拍歌勸酒也先曰南朝我之世仇今天使皇帝入我國我不敢懼南

朝若獲我肯留至今日乎又言皇上在此吾輩無所用之每遣使南朝令來迎竟不至何也實等反覆譬曉欲奉迎上皇意也先曰南朝遣汝通問非奉迎也若歸亟遣大臣來實等遂辭歸上皇出三書授實其一上皇太后其一達於上其一諭羣臣伯顏帖木兒約實速來成和好且指也先幼子曰此與朝廷議姻者實不敢對實未至京會脫脫不花亦遣使皮兒馬黑麻請和右都御史楊善慨然請行人皆危善善曰上皇在沙漠此爲臣者效命之秋也中書舍人趙榮

亦請往乃遣善榮及指揮王息于戶湯胤勣同皮兒馬黑麻往道遇實實告以故善曰得之矣卽敕書所無可權以集事也實旣還朝其述也先情及上皇起居狀諸文武大臣合疏言李實出塞道中行北騎聞欲議和皆舉手加額及見也先殊喜言迎使夕來大駕朝發實又具道也先悔過宜迎復上曰也先詐楊善已去第以迎復意書敕付也先使還大臣言也先非詐也臣等詢李實詳矣彼使來和當遣使答今請迎復乃不與偕是輕迎駕重講和也不迎駕歸何以

和爲帝令再議李實言也先臣迎駕毋出八月五日臣言須得旨不敢擅爲期也先言期必不可失遂令渠長偕羅綺往大同調還擾邊人馬臣還過懷來宣府見軍民始敢出郊芻牧誠非空言伏望陛下俯從羣請脫有虞詐亦可塞之若過所期更欲使臣亦不敢往帝竟付迎復于敕書而已不遣使曰待楊善歸監察御史畢鑾復言羣臣之請切矣陛下必待善歸夫中國所恃者信義也不迎不義失詞非信就令彼詐我備在也翰林邢讓亦以爲言帝曰上皇朕兄

豈有不迎彼情叵測正欲探之情誠而迎又何暮焉揚善旣出境也先使所善田民者爲館伴來迎且有所探飲帳中謂善曰我亦中國人被留于此前者土木之役六師抑何弱也善曰當是時六師之勁悉南征而中貴人振欲邀太上幸故里止扈從一不爲備故潰雖然彼幸而勝未見爲福今者南征之士悉歸可二十萬又募中外材官技擊得三十萬悉教以神鎗火砲藥弩射命中百步之外洞人馬復穿七札又用言者計沿邊要害皆隱金椎三尺所值蹄立穿刺

客林立夜度營幕若猿猴而皆已矣置之無用矣問何以言無用曰和議成方且歡飲若兄弟而又何用也其人悉以語也先二十九日至也先營值其出獵八月初二日丁卯與也先相見也先問減馬價故善曰往時外使不過三十人今多至三千餘人卽稚子亾弗賚者金帛器服絡繹載道而豈得言薄也先曰然則奈何留我使予我帛時剪裂幅不足者善曰帛有剪裂不足者通事爲之也事露而誅矣卽所進馬有劣弱而貂皮敝豈太師意耶至使臣所從人爲奸

益他所或遇害中國留之何用也先又問市益事善言此小民市易朝廷豈知善因歷述累朝恩遇之厚不可忘且言天道好生今縱兵殺掠上干天怒反覆辨論數千百言也先喜也先問上皇還更臨御否善言天位已定不得再易也先問古堯舜事如何善言堯讓位于舜今日兄讓位于弟也先愧服平章昂克問善欲迎復來何操善言若操賄來迎後人以爾貪賄歸上皇今無所操而歸也先問冊後世皆稱述也先然其言曰史中好爲書也先問本兒請醫使臣

遣使欲南朝更請上皇臨御也先曰曩令遣大臣來迎大臣至矣不可無信引善見上皇明日也先設宴餞上皇于其營善侍也先與妻妾以次起爲壽酒中令善坐上皇亦曰從太師言坐善曰雖草野不敢失君臣禮也先顧羨曰中國有禮罷酒送上皇出明日宴使臣又明日伯顏帖木兒設宴餞上皇又明日亦宴使臣又明日癸酉上皇駕行也先與渠帥送車駕可半日許下馬解方箭戰裙以進諸渠帥羅拜哭而去伯顏帖木兒獨送上皇至野狐嶺進酒帳房既畢

屏人語哈銘曰我也先順天意敬事皇帝一年矣皇帝此來爲天下也歸時還當作皇帝卽我主人有緩急我可得告衆皆道傍送駕進牛羊善口呼皇帝行矣伯顏帖木兒再送駕出野狐嶺口上皇攬轡慰藉而與之別伯顏帖木兒大哭歸仍命渠帥率五百騎送至京師旣別去行數里復有逸騎至上皇失色旣至乃其平章昂克出獵得一獐馳使來獻受之乃去駕入關不丑上皇至宣府南城上遣太常少卿許彬奉迎工部尚書高穀給事中劉福等言奉迎上皇

禮不宜薄禮部連日會議未定壬午上皇至宣府癸未千戶龔遂榮投書于高穀所穀袖入傳示文武大臣王直胡濙謂禮失而求諸野欲以上聞中止給事中葉盛程信于太上疏言諸大臣持一帖羣立午門傍聚觀議論藉藉乞宣問之書言上皇之出以宗社故非遊獵也都人聞上皇且還無不喜躍迎復禮宜厚上亦當避位懇辭然後復位否則貽譏後世上詰諸大臣已而知書出穀所上曰朕未嘗塞言路穀大臣胡不告朕爲匿名書耶遂榮恐累穀乃發憤自白

深罪也尋釋之已卯上皇至懷來將抵居庸禮部始得旨羣臣同禮部議迎復儀注兵部總戎議防變方畧百官集會議所都御史王文忽厲聲曰孰以爲來耶黠寇不索金帛必索土地耳衆素畏文相顧莫敢言給事中葉盛等造禮部問時胡濙已具儀注送內閣矣畧謂天寶之亂玄宗幸蜀肅宗卽位靈武尊玄宗爲太上皇帝肅宗收復兩京迎還上皇至咸陽備法駕望顏樓上皇在宮南樓肅宗著紫袍望樓上拜

舞樓下上皇降樓撫肅宗而泣辭黃袍自爲肅宗著之肅宗伏地頓首固辭上皇曰天下人心皆歸于汝使朕得保餘齡汝之孝也肅宗乃受今備法駕安定門外誠爲太簡帝曰慮墮狡寇計故簡其禮大兄入城朕知尊親遂備法駕候安定門外庚辰上皇至唐冢嶺遣使回京詔諭避位免羣臣迎丙戌百官迎上皇于安定門上皇自東安門入上迎拜上皇荅拜各述授受意遜讓良久乃送上皇至南宮群臣就見而退大赦天下命保定伯梁瑤征苗寇以河間等降

丁從征先是永樂間塞北部落來降者多安置河間東昌等處生養蕃息強悍不可制方也先入寇乘機騷動至是大發兵征兩廣湖貴苗寇兵部尚書于謙奏遣之其有名號者厚賞犒隨軍有功則官之已而更遣其妻子往自是肘腋無他患

二年秋九月也先遣使求通好固邀我使往報上從言官議詔絕之

三年夏四月命都督同知孫安鎮守獨石馬營以兵科都給事中葉盛爲山西右叅政協贊軍務先是楊

洪鎮獨石馬營等八城已失守燬未復議者欲棄之于謙曰棄之則不但宣府懷來難守京師不免動搖乃薦安授以方畧仍命盛贊其軍務盛至則利害入條以進次第行之率兵度龍門關且戰且守八城完復如舊盛又請帑金五千兩買牛犢簡戍卒不任戰者俾事耕稼歲課餘糧于官凡軍中買馬修器勞功恤孤諸費皆取之盛在獨石五年軍民賴之邊境得安時土木北狩浙閩三楚貴竹盜賊蠡起前後命將將兵皆出謙獨運號令明審動合機宜雖宿舊

勲臣少不中程律卽請旨切責不貸片紙行萬里電
耀震擊靡不惴惴效力毋敢飾虛辭以抵者以故天
下咸服謙而歸上能用人

谷應泰曰英宗北狩戰士兵甲歿亾畧盡邊關
守隘望風奔潰搖足之間黃河以北非國家有
矣幸而遷都議格鍾簷不驚然而君父叩關臣
子拒敵彼出有名我負不義狐疑旣生上下瓦
解講使亟行責問無已長安必不可守英宗必
不能歸徒使有貞之輩操星象而笑其後也嗟

乎南遷不行然後國存和議不行然後君存兩
議俱息君國皆存而少保之禍不得旋踵矣當
夫北兵四合守禦單寒虎穴故君已置度外圍
城新主亦危孤注身先矢石義激三軍家置環
寺之薪人守州兵之哭傲如石亨怯如孫鏗懦
如玉通無不斬將塞旗綠城血戰追奔逐北所
向披靡此一役也軍聲復振君臣固守陵闕磐
石矣然而遣使入朝動請迎駕懸師剽掠輒托
回鑾彼直我曲彼壯我老也先者方且挾此奇

貨○羈○制○中○原○以○戰○不○收○以○和○可○成○輸○幣○不○還○進○
而○割○地○割○地○不○歸○誘○之○稱○臣○中○原○生○靈○自○此○無○
安○枕○矣○而○乃○兄○終○弟○及○父○子○之○情○既○割○社○稷○爲○
重○君○臣○之○義○亦○輕○至○則○龍○衣○糗○食○敬○輸○橐○餽○之○
忱○歸○亦○別○院○閉○宮○不○過○漢○家○之○老○然○則○挾○天○子○
者○挾○一○匹○夫○耳○邀○利○之○心○解○而○好○義○之○心○萌○郭○
登○之○言○決○而○楊○善○之○說○行○英○皇○自○此○生○入○玉○門○
矣○昔○太○公○置○鼎○漢○祖○分○羹○徽○欽○被○執○宋○高○哀○請○
一○則○新○豐○鷄○犬○還○老○關○庭○一○則○淚○灑○冰○天○終○手○

輿○觀○蓋○相○如○碎○璧○而○璧○存○賈○胡○藏○珠○而○珠○去○擁○
空○名○者○視○同○虛○器○居○必○爭○者○勢○難○及○全○也○夫○昭○
王○沉○漢○穆○滿○難○歸○楚○懷○入○秦○頃○襄○不○反○彼○此○得○
失○危○不○間○髮○故○漢○高○分○羹○之○語○乃○孝○子○之○變○聲○
郭○登○有○君○之○謝○實○忠○臣○之○苦○節○英○宗○不○感○生○還○
反○疑○予○敵○謙○歟○東○曹○登○貶○南○都○忠○臣○義○士○所○以○
仰○天○椎○心○而○泣○血○也○景○帝○外○倚○少○保○內○信○興○安○
俊○寇○危○城○不○動○聲○色○當○時○朝○右○豈○乏○汪○黃○建○炎○
踐○祚○亦○有○宗○李○相○提○而○論○景○誠○英○主○而○乃○戀○戀○

神器則又未聞乎大道者也

[Faded bleed-through text from the reverse side of the page]

紀事本末卷之三十四

提督浙江學政僉事豐潤谷應泰編著

際科

男

際第

訂

河決之患

英宗正統十三年秋七月河決滎陽經曹濮衝張秋潰沙灣東堤奪濟汶入海尋東過開封城西南經陳留自毫入澗口又經蒙城至淮遠界入淮命工部尙書石璞治之弗就尋復以侍郎王永和代璞舊黃河

在開封城北四十里，洪武二十四年，河決原武東，經開封城北五里，又南行至項城，經潁州，潁上縣東至壽州，正陽鎮全入于淮，而元會通河遂淤。永樂九年，尙書宋禮濬會通河，開新河自汶上縣袁家口左，從二十里至壽張之沙灣，接舊河，九閱月而績。成侍郎金純從汴城金龍口下達塌塢口，經二洪南入淮。漕事定爲罷海運，至是又決滎陽，過開封城西南兩城北之新河，又淤。自是汴城在河北矣。隋唐以前，河與淮分自入海。宋中葉以後，河合于淮，以趨海。然前代

河決不過壞民田廬，至明則妨漕矣。故視古尤急。

十四年春三月，工部右侍郎王永和奏治河事宜。先是沙灣之役，永和以冬寒遽停工，又以決自河南，救彼其事，上切責之。至是言黑陽山西灣已通水，從泰通寺資運河，東昌則置分水閘，設三空泄水入大清河，歸于海。八柳樹工猶未可用。沙灣隄宜時啓，分水三空瀉上流，庶可亡後患。從之。

景帝景泰三年春二月，河決沙隄灣，命左都御史王文巡視河道。

四年冬十月以左諭德徐有貞爲右僉都御史遣治張秋決河先是河溢滎陽自開封城北經曹濮以入運河至兗州沙灣之東隄大洪口而決濟汶諸水皆從之入海會通河遂淤漕運艱阻工部尙書石璞侍郎王永和都御史王文相繼治之凡七年皆績弗成乃集廷臣議于文淵閣舉可治水者以有貞名上乃進有貞都察院右僉都御史治之河以決故涸而有貞至方冬月水暴漲公私之艘畢達治河卒踰數萬人悉與之期而遣之乃乘輕航究河源遂踰濟汶

衛汴循大河道濮范還上疏曰臣聞平水土要在知天時地利人事而已蓋河自雍而豫出險之平水勢旣肆又由豫而兗土益疎水益肆沙灣之東所謂大洪口者適當其衝于是決而奪濟汶入海之路以去諸水從之而洩隄潰渠淤澇則溢旱則涸此漕途所由阻然欲驟湮則潰者益潰淤者益淤今請先疏上流水勢平乃治決決止乃濬淤多爲之方以時節宜俾無溢涸必如是而後有成上從之

七年夏四月僉都御史徐有貞治河功成先是有貞

疏上既報可乃鳩工而前所遺卒亦依期至乃爲渠以疏之中置閘以節宣之渠起金隄張秋之首西南行九里至濮陽濼又九里至博陵坡又六里至壽張沙河又八里至東西影塘又十有五里至白嶺灣又三里至李準由李準而上又二十里至蓮花池又三十里至大溜潭乃踰范暨濮又上而西凡數百里經澶淵以接河沁有貞曰河沁之水過則害微則利乃節其過而導其微用平水勢既成渠名廣濟閘各通源渠有分合而閘有上平凡河流之旁出而不順者

則堰之堰有九長各萬丈九堰既設水遂不東衝沙灣而更北出濟漕渠阿西鄆東曹南鄆北出沮洳而資灌溉者爲田百數十萬頃凡堰鍵以木門繚以虹隄堰之崇三十餘尺其厚什之長百之門之廣三十六丈厚倍之隄之厚如門崇如堰長倍之架濤截流柵木絡竹實之石而鍵以鐵蓋合五行用平水性而導汶泗之源出諸山匯澶濮之流納諸澤又濬漕渠由沙灣北至臨清凡二百四十里南至濟寧凡三百一十里復建閘于東昌之龍灣魏灣者八積水過丈

則開而洩之皆道古河以入于海。用平水道初議者欲棄渠勿治而由河沁及海以漕。又欲出京軍疏河。有貞因奏蠲瀕河民馬牧庸役。專力河防。以省軍費。紓民力。工部請如有貞言不中制。以是得有功。蓋三年而告成。是役也。聚而問役者四萬五千人。分而常役者萬三千人。用木大小十萬。竹倍之。鐵斤十有二萬。錠三千。繩八百。釜二千八百。麻百萬。舳舻倍之。藁秸又倍之。而用石若土不可筭。然用糧于宮儲五萬石。功成。進副都御史。初有貞方鳩功。有言沮者。上復

月河十餘。以殺其勢。塞決口三十六。由河入汴。汴入睢。睢入泗。泗入淮。以達于海。水患稍息。昂又以河南入淮非正道。恐不能容。乃復自魚臺歷德州至吳橋。修古河隄。又自康平北至興濟。鑿小河十二道。引水入大清河。及古黃河。以入海。河口各作石堰。相水盈縮。以時啓閉。蓋東北分治而東南王疏云。太監李興五年秋七月。張秋河決。命工部侍郎陳政督治之。時河溢沛梁之東。蘭陽鄆城諸縣皆被其患。復決楊家金龍等口。東注潰黃陵岡。下張秋隄。入漕河。與汶水

合而北行張秋隄乃遣政往政尋率八營與水
六年春正月命浙江左布政使劉大夏為右僉都御
史督治張秋決河
七年春二月河復決張秋命平江伯陳銳太監李興
協同都御史劉大夏督治之先是大夏既受命循河
上下千餘里相度形勢乃集山東河南二省守臣議
之上言河流湍悍張秋乃下流襟喉未可輒治治于
上流分道南行復築長隄以禦橫波且防大名山東
之患候其循軌而後決河可塞也疏上報可工方興

中使問之有貞示以二壺一壺之竅一一壺之竅五
泮水二壺五竅先涸中使還報上上惟有貞之所為
有貞常欲築一決口下木石則若無者心怪之聞僧
居山中有道有貞往叩焉僧無所答徐曰聖人無欲
有貞沉思竟日悟曰僧言龍有欲也此其下有龍穴
吾聞之龍惜珠吾有以制之矣鐵能融珠乃鎔鐵數
萬金沸而下之龍一夕徙而決口塞

孝宗弘治二年夏五月河決開封入淮復決黃陵岡
入海

三年夏四月河決原武命戶部左侍郎白昂往治之
河決支流爲三其一決封丘金龍口漫于祥符長垣
下曹濮衝張秋長堤一出中牟下尉氏一汜溢于蘭
陽儀封考城歸德以至于宿瀾漫四出不由故道禾
盡沒民溺歿者衆議者奏遷河南藩省以避其害左
布政使徐恪力陳不可乃止命昂往治之昂舉南京
兵部郎中婁性協治乃築陽武長隄以防張秋引中
牟之決以入淮浚宿州古睢河以達泗自小河西抵
歸德飲馬池中徑符離橋而南皆浚而深廣之又疏

而張秋東隄復決九十餘丈奪運河水盡東流由東
阿舊鹽河以入于海決口濶至九十餘丈詎言沸騰
謂河不可治宜復元海運或謂陸輓雖勞無虞乃復
命銳等協治之河南巡撫都御史徐恪上言臣按地
誌黃河舊在汴城北四十里東經虞城下達濟寧洪
武二十四年決武原縣黑浮山東經汴城北五里又
南至項城入淮而故道遂淤正統十三年決于張秋
之沙灣東流入海又決棗澤縣東經汴城歷睢陽自
亳入淮景泰七年始塞沙灣之決而張秋運道復完

以後河勢南趨而汴城之新河又淤弘治二年以來
漸徙而北又決金龍口諸處直趨張秋橫衝會通河
長奔入海而汴南之新河又淤百餘年間遷徙數四
千里之內散逸瀾漫乃者上厯聖衷特命都御史劉
大夏經理而伏流橫溢功力未竟議者以黃陵岡之
塞口不合張秋之護隄復壞遂謂河不可治至有爲
海運之說者得毋以噎而廢食哉夫黃陵岡口不可
塞者非終不可塞也顧以修築隄防之功多疏濬分
殺之功少故湍悍之勢不可遮回今自蒙澤縣後

渡口舊河東經朱仙鎮下至項城縣南頓猶有滄涓
之流計其淤淺僅二百餘年若疏而濬之使之由泗
入淮以殺上流之勢又以黃陵岡買營舊河南經曹
縣梁進口下通歸德丁家道口且可以分水勢今梁
進口以南則滔滔無阻以北則淤塞將平計其功力
之施僅八十餘里若疏而濬之使之由徐入淮以殺
下流之勢水勢既殺則決口可塞運道可完毋求近
功毋惜小費毋以小債敗輒阻幸而成功則萬世之
利也命下部議行之山東按察司副使楊茂仁上言

官多則民擾治河既委劉大夏又命李興陳銳事權分而財力匱且水陰也其應爲官閘爲四築宜戒飭后感防禦邊患疏上興等切齒之誣茂仁爲妖言逮繫獄科道交章論救乃謫同知茂仁守陳子也夏四月寒張秋隄更名安平鎮先是劉大夏發民丁數萬於上流西岸鑿月河三里許屬之舊河使漕通不與河爭道乃浚孫家渡口別開新河一道導水南行由中牟至潁州東入于淮又浚祥符四府營縣淤河山陳留至歸德分爲二道一由宿遷小河口一出

州渦河會于淮又于黃陵岡南浚賈魯舊河四十里由曹縣出徐州支流旣分水勢漸殺乃築西長隄起河南胙城經滑長垣東明曹單諸縣盡徐州長三百六十里五旬而事竣費輕功重逾于徐有貞云鹽書褒賞八爲戶部右侍郎始河自清河隙入淮大夏治之自宿遷小河入淮則北三百里矣已又北三百里至徐州小浮橋入淮九月加山東叅政張縉秩爲通政使代劉大夏理河道初大夏治決河委縉調度及成功遂陞爲通政司右通政時衝決之餘溝防不

治。緝相其緩急，以漸修濬，無所遺。又于決口之東，砌石岸數里，以固舊防。又新築南旺東隄，樹柳其上。每歲夏秋水溢，挽卒得分行無阻，至今便之。

武宗正德四年，河決曹單趨沛，出飛雲橋，命工部侍郎崔巖往治。巖發丁夫四萬餘人，塞垂成，漲潰，代以右侍郎李鏜。四月，弗成，盜起而罷。

七年秋九月，以右都御史劉愷總理河道。愷築大隄，起魏家灣，亘八十餘里，至雙烟集。都御史趙璜又隄三十里，續之曹單以寧。

世宗嘉靖七年春正月，鑿新漕不成。先是河決曹單城武陽家口，梁靖口，吳士舉莊，衝鷄鳴臺，沛北皆爲巨浸，東溢逾漕，入昭陽湖，沙泥聚壅，運道大阻。刑部尚書胡世寧上言：運道之塞，河流致之也。請先述治河之說，河自經汴以來，南分二道，其一出榮澤，經中牟、陳、潁，至壽州入淮；其一出祥符，經陳、留、睢、亳，至懷遠入淮。其東南一道，自歸德、宿虹，出宿遷，其北分新舊五道：一自長垣、曹鄆，出陽穀；一自曹州、雙河口，出魚臺、楊場；一自儀封，出徐州、小浮橋；一出沛縣、飛雲。

橋一出徐沛之間。境山之北溜溝。此六者皆入漕渠。而南匯于淮。而今且堰塞矣。止存沛縣一河。勢合維狹。不得不溢。所以豐沛徐州漫爲巨浸。溢入沛北之昭陽。以致運道壅淤。然壅淤旣久。勢必復決。決而東南有山限隔。其禍小。決而東北。前宋漕州之決。郡縣數十皆灌。禍不可言矣。故今治河當因故道而分其勢也。其陽穀魚臺二道。勢近東北。不可復開。而沛西榮澤孫家渡至壽州一道。決宜常濬。以分上流之勢。自沛東南原出懷遠宿遷。小浮橋溜溝曰道。宜擇其

便利者。開濬一道。以分下流之勢。或恐豐沛漫流久而北徙。欲修城武以南廢隄。至于沛縣之北廟道口。以塞新決。而防其北流。此亦一計也。至于運道。臣與李奉勛同行擬議。莫若于昭陽湖左。滕沛魚臺之中。地名獨山。新安社諸處。別開一河。南接留城。北接沙口。濶五六丈。以通二舟之交。來冬冰結船止。更加濬濶。以爲運道。此其上策也。至是河道都御史盛應期上言。宜于昭陽湖左。別開新渠。北起善家口。南至留城。一百四十餘里。以通漕舟。其說與世寧合。工部尙

書童瑞覆議從之乃集民夫萬人分標開鑿已而其地居河上流土皆沙淤功弗就應期日夜止宿水次益卒數萬治之百姓滋怨言者謂糜財用勞民力功必不可成上怒奪應期官歸田里而新渠之議寢焉以侍郎潘希曾往代驗年豐沛單三縣隄成十三年初飛雲橋之水北徙魚臺穀亭舟行闕面豐沛以北稍遠水患久之復決趙皮寨穀亭流絕而朔道口復淤議者欲引沁鑿備置激會衛輝由渦經水達陽武陸輓之始由衛北運言人人然時治河者工

部侍郎劉天和專修復故道未幾河忽自夏邑大丘等集衝數隙轉東北流經蕭縣出小浮橋下濟二洪趙皮寨尋塞蓋河勢南徙

十九年河決睢州野鷄岡經渦入淮二洪大涸上命兵部左侍郎王以旂督理以旂役丁夫七萬開李景高支河一道引水出徐濟洪八月而成糧運無阻上悅加以旂秩尋復淤是時河益南徙頗便漕然五河蒙城臨淮諸州邑鳳泗之北祖陵在焉議者以為憂三十一年秋八月河決房村至曲頭集凡決四處淤

四十餘里都御史曾鈞後丁夫五萬六千有奇濬之
 三閱月而成
 三十七年河北徙新集淤而為陸二百五十餘里視
 故道高三丈有奇河分流弱離為十一河南山東徐
 邳皆苦之

四十四年秋七月河盡北徙決沛之飛雲橋橫截逆
 流東行踰漕入昭陽湖泛濫而東平地水文餘散漫
 徐從沙河至二洪浩渺無際而河變極矣初漕渠左
 視昭陽湖其地沮洳去河不數十里識者危之嘉靖

初盛應期督漕議鑿渠湖左以避河患朝廷從之鳩
 工未半為異議所阻至是漕堙以吏部侍郎朱衡出
 督漕鑿衛與兗都御史潘季馴尋應期所開故道以
 為運道之利無逾于此疏請鑿之開新河自南陽達
 留城百四十一里濬舊河自留城達境山五十三里
 後丁夫九萬餘八閱月而成而水始南趨秦溝

穆宗隆慶元年春正月開廣秦溝以通運道先是河
 決沛縣議者請復故道乃議新集郭貫樓諸處上源
 尚書朱衡言古之治河惟欲避害今之治河兼欲資

秋河流出境山之北則闡河淤出徐州之南則二洪
涸惟出自境山至徐州小浮橋四十餘里間乃兩利
而無害自黃河橫流碣山郭貫樓支河皆已淤塞改
從華山分爲南北二支南出秦溝正在境山以南五
里許此誠運河之利也惟北出沛西及飛雲橋逆上
魚臺爲患甚大陛下不忍沛魚之民橫罹昏墊欲開
故道臣考之地形參之輿論其不可者有五自新集
至兩河口皆平原高阜無尺寸故道可因郭貫樓至
龍溝一帶頗有河形又係新淤無可駐足其不可一

也河流由新集則商虞夏邑受之由郭貫樓則蕭礪
受之今改復故道則魚沛之禍復移蕭礪其不可二
也黃河西注華山勢若建瓴欲從中鑿渠挽水南向
必當築壩爲力甚難其不可三也曠日持久役夫三
十萬騷動三省其不可四也工費數百萬司農告匱
其不可五也臣以爲上源之議可罷惟廣開秦溝使
下流通行脩築長隄以防奔潰上從之乃鑿舊渠深
廣之引鮎魚諸泉薛沙諸河其中注灞三河口疏舊
河築馬家橋隄道之出飛雲橋者使盡入秦溝自留

至赤龍潭又五十三里凡爲閘八減水閘二十爲壩十有二隄三萬五千二百八十丈石隄三十里已而鑿王家口導薛河入赤山湖鑿黃甫導沙河入獨山湖凡爲支河八旱則資以濟漕潦則洩之昭陽湖運道盡通是名夏鎮河工成加衡太子少保于是河專由秦溝入洪而河南北諸支河悉并流秦溝

三年秋七月河水溢自清河抵淮安城西淤者三十餘里決方信二壩出海平地水深丈餘寶應湖隄崩壞山東莒郟諸處水溢從沂河直河入邳州人民溺

焉

四年秋九月河決邳州自睢寧白浪淺至宿遷小河口淤百八十里溺死漕卒千人失米二十餘萬石總督河道侍郎翁大立言邇來黃河之患不在河南山東豐沛而專在徐邳故欲先開泇河以遠河勢開蕭縣河以殺河流者正謂浮沙壅聚河面增高爲異日慮耳今秋水洊至橫溢爲災臣以爲權宜之計在棄故道而就新衝經久之策在開泇河以避洪水疏下

部

五年河決雙溝先是河漲徐州上下茶城至呂梁兩
厓東山不得下又不得決至是乃自雙溝而下北決
油房曹家青羊諸口南決關家曲頭集馬家淺閘家
張擺渡王家房家白糧淺諸口凡十一枝流既散幹
流遂微乃淤自魁頭灣八十里而河變又極矣趙孔
昭翁大立前後治之無功議者欲棄幹河而行舟于
曲頭集大枝間冬初水落則幹已平沙而枝復阻淺
又議棄黃河運而膠河泃河海運紛沓莫可歸一于
是卽家起都御史潘季馴治之季馴之治水惟求復

故道而已乃上言老河故道自新集歷趙家圈出小
浮橋安流無患後因河南水患別開一道出小河口
本河漸被沙淺嘉靖間河北徙故道遂成陸地臣奉
命由夏鎮歷豐沛至崔家口由崔家口歷河南歸德
虞城夏邑商丘諸縣至新集則見黃河大勢已直趨
潘家口矣父老言去此十餘里自丁家道口以下二
百二十里舊河形跡見在可開臣卽自潘家口歷丁
家道口馬牧集韓家道口司家道口牛黃垸趙家圈
至蕭縣一帶皆有河形中間淤平者四分之一河底

皆滂沙見水即可衝刷臣以為莫若修而復之河之復其利有五從潘家口出小浮橋則新集迤東河道俱為平陸曹單豐沛永無昏墊一利也河身深廣每歲免泛溢之患虞夏豐沛得以安居二利也河從南行去會通河甚遠開渠無虞三利也來流既深建甌之勢導滌自易則徐州以下河身亦因而深刷四利也小浮橋來流既遠則秦溝可免復衝而茶城永無淤塞之患五利也既報可乃役丁夫五萬開匙頭灣塞十一口大疏八十里故道漸復已而以漕舟壞季

馴閑任

六年春河決邳州運道阻總河侍郎翁大立復議開加河以遠其勢潘季馴言加與黃河相首尾今河南浹淮揚北決豐沛漕渠不相屬加處中將焉用之已而以漕舟壞季馴被劾歸給事中雒遵言治河有效無如工部尙書朱衡者乃詔衡與總河都御史萬恭覆視則加口限嶺阻石竟報罷而一意事徐邳河衡上言茶城以北防黃河之決而入茶城以南防黃河之決而出故自茶城至邳州宿遷高築兩隄宿遷至

清河盡塞決口蓋防黃河之出則正河必淤昨歲徐
邳之患是也自茶城秦溝口至豐沛曹單以接縷水
舊隄蓋防黃河之入則正河必淤往年曹沛之患是
也二處告竣沛縣窩子頭至秦溝口應築隄禦之命
萬恭總理其事役丁夫五萬有奇分工畫地而築之
夏四月兩隄成北隄起磨臍溝迄邳州之直河南隄
起離林鋪迄宿遷之小河口各延袤三百七十里運
艘束于河流睢邳之間可以稼建舖立舍設軍民守
之如河南山東黃河例河乃安運道嘉隆之間治河

者以衡恭季馴爲能

神宗萬曆五年秋八月河決崔鎮淮決高家堰橫流
四溢連年不治詔復以潘季馴爲右都御史總理河
漕時有議當疏海口者季馴言海口不能以人力疏
治而可以水勢衝決計莫如築高家堰塞崔鎮東河
淮正流使金趨入海上可其奏季馴爲之三年而高
家堰成一夕黃浦涸得龍首以獻其大專車時以此
龍首渠云

十五年冬十月命工科給事中韋居敬相度黃河議

修治之策時黃河漫流自開封封丘偃師及東明長垣多衝決大學士申時行言失今不治河將北徙上流不下徐淮財運道可憂故有是命已而督河楊一魁議因決濟運導沁入衛居敬言衛輝城卑于河恐一決有衝潰之患沁水多沙善淤入漕未便不如堅築決口開河身加浚衛河民得灌田尤爲完計上從之

十六年春三月禮科給事中王士性上言黃河自徐而下河身高而束以隄行隄與徐州城平委全力於淮而淮不在黃水乘運河如建瓴淮安高寶興鹽諸生民託之一丸泥決則盡化魚鱉而議者如蟻穴漏卮補救無寧歲總不如復故道爲一勞永逸之計也河故道由桃源三義鎮達蕪家衝與淮合在清河縣北別有濟運一河在縣南蓋支河耳河強奪支河直趨縣南而自棄北流之道久且斷河形固在也自桃源至瓦子灘九十里地下不耕無廬墓之碍至開河費視諸說稍倍而河道一復爲利無窮章下所司章居敬言故道難復不行復議開管家營支河尋諸決

口皆塞淤者復疏。夏六月總理河道潘季馴上言：河水濁而強，汶泗清而弱，交處則茶城也。每至秋黃，水發入淮，沙停而淤勢也。黃水減，漕水從之，沙隨水流。河道自通，縱有淺阻，不過旬日，往者立石洪內，華土開，遇水發，即閉之，以遏其橫。黃水落，則啓之，以出泉水。但建閘易守，開難，貢使之馳行，勢要之開放，急不能待，而運道阻矣。乞禁啓閉之法，報可。

十七年，河決雙溝，單家口。于是專議築趙皮寨。至李景高口，選隄築將軍廟。至塔山，長隄築羊山。至世山。

橫隄河防幸無事

十九年秋九月，泗州大水，淮水泛溢，高于城，溺人無算。浸及祖陵，總督河道潘季馴上言：水性不可拂，河防不可弛，地形不可強，治理不可整。人欲棄舊以爲新，而臣謂故道必不可失。人欲支分以殺勢，而臣謂濁流必不可分。霖霖水漲，久當自消。時季馴凡四治河，河皆治。季馴之議，以爲河性湍悍，善徙者水漫而沙壅也。法莫若以隄束水，以水攻沙，循河故道，束而湍之，使水疾沙刷，無留行，而又近爲縷隄，縷隄之外。

復為選隄故水益淺遠不至旁決

二十三年夏四月命工利給事中張企程勘淮泗工
先是邳州高郵寶應大雨水湖決壞隄泗州水浸祖
陵巡按御史牛應元言沿河在開清口浮沙次疏草
灣下流達伍港灌口廣其途入海次開周家橋達芒
稻河入江而鮑王諸口決為巨浸難以施工或分其
水築黃垆戍口之壩疏符離集雖水之淺澹宿遷小
河入黃之口故有是命已而企程覆奏隄處未高寶
淮揚告急當事狃于目前清口既淤又築高堰隄張

福以東之障全淮以角黃舉七十二溪之水匯于泗
者僅口數丈出之出之十一漕之十九河身日高安
得不倒溢以灌泗乎今高家堰費鉅未可議廢且弁
高寶淮揚亦不可少周家橋北去高堰五十里其支
河接葦子湖若浚三十餘里一自金家河入芒稻河
注之江一自子嬰溝入廣羊湖注之海則淮水泄矣
武家墩南距高堰十五里備永濟河引水自密灣開
出口直達涇河自昭陽湖入海則淮之下流有歸此
急救祖陵之議也九月總督漕運褚鐵議導淮總

理河道楊一魁議先分黃次導淮御史牛應元議合
行之又爲祖陵計黃埧口決當制小林口淤當挑歸
仁隄當培上從之括帑五十萬役夫二十萬分黃導
淮自黃江嘴導河分趨五港灌口徑入海以殺黃勢
毋盡入淮導淮則自清口闢積沙數十里又于高堰
旁若周家橋武家墩稍引淮支流入于湖爲預浚入
江入海路以泄之祖陵水漸退而水患息

二十四年九月戊戌河工成總理河道楊一魁總督
漕運禱鐵等賞賚有差

二十五年春正月壬寅河決黃埧口總督漕運尚書

禱鐵言黃口宜塞否則全河南徙害將立見三月

漕小浮橋沂河口小河口工成自河南徙徐邳復見

清泗議者謂全河水微妨運決口不塞恐下蓄歸仁

爲二陵患獨總河尚書楊一魁謂黃埧口深淵難塞

議浚小浮沂泗築小河口工成果利運尋久旱運河

澀而河又決義安東壩一魁議浚黃埧口及上歸灣

活嘴以受黃水救小浮橋泗上之泗因繪河圖土言

黃河自古爲患近自分黃道淮工成鳳泗淮楊免昏

聖之災又自黃堦一決全河南徙堯豫徐邳得免河
患而其餘波出於義安者又導之入小浮橋足以濟
二洪之涸則今日之河既有合于決隄放水之議矣
而議者猶曰運道有淺澀之虞祖陵有意外之患地
方有淹沒之苦不知國家運道原不資于河全河初
出亳壽之郊以不治治之故歲無治河之費其後全
河漸決入運因遂資其漕輸五十餘年久假不歸又
日築垣而居之涓滴不容外洩于是濁沙日激河身
日高上過汶泗則鋪口受淤魚滕被侵下壅清淮則

退而內潴盱泗爲魚以至瀕河沒溺歲運飄流甚至
浸及祖陵而當事者猥以運道所資勢不能却之他
徙臣奉明命改絃易轍首開武墩經河次疏具壩固
莊又挑小浮橋小河口沂河口故道幸小浮橋股引
之水字吉口未斷之流已足濟運矣以汶泗沂兗之
水建閘節宣運道自在固不必殫力決塞以回全河
蓋決河所經有山西阜子諸坡湖以爲之滙有小河
白洋固朱等河溝以爲之委祖陵雄據上游崇岡疊
嶂諒無可慮卽歸仁一隄見爲險要亦非水衝萬一

失守亦不過下浸桃清由淇澤諸湖以下清口勢不能逆流倒灌上及盱泗也至南流泛濫雖不免爲下邑民生之害碣山水道當衝南流北流俱不得免必須遷城以避河患其以泗口被災者惟有蕭宿靈雖往者全河未徙之時豐沛魚滕徐邳不被淹沒乎近庚寅癸巳之秋徐邳二州不幾爲魚鱉乎較之今日孰重孰輕故臣始終自信以爲止就已成之功稍終未完之緒則自不至爲運道之虞亦不能爲陵寢生民之患抑臣又有說焉禹之導河析二渠播九河

水之所向不與爭利今河南山東江北州縣若列星布在在隄防水不及汴梁矣則恐決張秋不及張秋矣又恐淤鎮口不及鎮口矣又恐淹宿州凡禹之所空以與水者今皆爲我所占無容水之地固宜其有衝決也今若空碣山一邑之地北導李吉口下濁河南存徐溪口下符離中存盤岔河下小浮橋三河並存南北相去五十里在水游蕩以不治治之量蠲一邑千金之賦歲省修河萬金之費此亦一時之省事萬世之良圖也

二十六年春三月工科給事中楊應文請開泇河泇河在滕嶧沂沐下流南通淮海隆慶以來翁大立數議未決舒應龍嘗鑿韓莊中輟時河決黃堍口請終其功報可夏六月以工部侍郎兼右僉都御史劉東星總理河道漕運東星循行河隄謂阻漕治在標決河治在本兩利而並存之議開趙渠蓋商城虞城以下至于徐州元賈魯故道也嘉靖末北徙潘季馴議開之計費四百萬而止及河決單縣黃堍口稍通成渠惟曲里館至三仙臺四十里如故東星曰欲浚之又自三仙臺至泗州小浮橋開支河又濬漕河起徐邳至宿費可十萬緡

二十九年秋九月河決蕭家口先是開封歸德大水商城蒙城等處河衝蕭家口百餘丈全河南徙淮泗賈舟不及去置于沙上總督河漕工部尚書劉東星率干濟寧東星浚趙集開泇河工未竟而卒十一月河南道御史高舉言膠萊海運嘉靖間山東副使王憲議開膠萊河河之南口起麻灣北口至海滄相距三百三十里其地河形至今尚在兩口皆貯潮

水不假濬者二百餘里，濬者一百三十里，但其下多石，水微細，使極力開鑿，止三十里遠耳。如河成，我江漕由淮安清江浦，歷新壩、馬家濠而來，計良便。國初罷海運者，以馬家濠未通，舟出大洋故也。馬家濠通，舟行小海中，自不險。從麻灣、海滄二口，徑抵天津直沽，至是舉循其議，上格于守臣而止。

三十一年春正月，山東巡撫黃克績言：開王家口，爲蒙牆上流，上流既達，則下流不宜旁泄，宜塞從之。

夏四月，總理河道侍郎曾如春卒。如春治河，力主開黃家口，領六十萬金，鑄智昇，慮既開新河，雖深廣，其南反淺隘，故水不行，以決河廣八十餘丈，而新河僅三十丈，不任受。或告如春曰：若河流既回，勢如雷霆，藉其自然之勢衝之，何患淺者之不深？如春遂令放水，河流濁下，皆泥沙，流勢稍緩，下已淤半矣。一夕水漲，衝魚臺，單縣豐沛闕，如春聞之，驚悸暴卒。以工部右侍郎李化龍總理河道。

三十二年春正月，總理河道侍郎李化龍請開泇河，曰：河自開封歸德而下，合運入海，其路有三，由蘭陽

出茶城向徐邳名濁河為中路由曹單豐沛出飛雲橋向徐溝名銀河為北路由潘家口入宿遷出小河口名符離河為南路南路近陵北路近運惟中路既遠干陵亦濟干運前督臣排羣議與茲後竟以資用乏絕不得竣事然自堅城以至鎮口河形宛然故為今計惟守行堤開泲河為便上從之 秋八月河決蘇家莊淹豐沛黃水逆流灌濟寧魚臺單縣而魚臺尤甚 九月壬申分水河成

三十三年秋七月壬午呂梁河澀給事中宋一韓論

前總督李化龍泲河之誤不報

三十四年夏四月癸亥河工成自朱旺口至小浮橋袤百七十里河歸故道役五十萬人費八十萬金五閱月而竣

懷宗崇禎六年夏五月運河淺阻降總理河道尚書朱光祚一級

七年冬十一月漕運總督楊一鵬議濬泲河從之

八年秋九月逮總理河道尚書劉榮嗣初榮嗣以駱馬湖阻運自宿遷至德州開河注之既鑿黃水朝暮

遷徙不可以舟，給事申曹景參劾之，被逮。

九年夏四月，滎河重潰成。

十五年秋九月，李自成圍開封，河決，城陷。先是開封城北十里，枕黃河，至是賊圍城久，人相食。壬午夜，河決，開封之朱家寨，溢城北，越數日，水大至，灌城。周王恭枋走磁州，以巡按御史王燠舟迎之也。巡撫高名衡、推官黃澗等，俱北渡，吏卒倉猝，各奔避。士民涇溺，死者數十萬人。城俱圯，賊屯高地，獨全。開封古都會，當庚甲于中原，竟成巨浸，水大半入滎，入泗，入淮，與

故河分流，邳亳皆災。

谷應泰曰：河自龍門下浮，束于萬山，南至豫州。

地平勢怒，而河無安流矣。故河之決，必在河南。

而既決之後，不南侵全淮，即北衝齊魯，侵全淮。

者，潰散于邳亳，徐宿而害在田廬，民業衝齊魯。

者，橫激于曹濮，單鄆而患兼在堤防，道然淮。

近而身大，決入淮者患小，而治速。漕遠而身小。

決入漕者患大而治難也。洪武初，河決原武，自

潁壽入淮。正統末，春秋河決，滎陽入漕，潰沙。

灣入海景泰三年春河又決沙灣弘治二年夏
 河決開封入淮三年夏河決原武支流三一自
 封丘下衝張秋一出中牟尉氏一溢蘭陽及歸
 德瀰漫至宿五年秋河決張秋七年春河又決
 張秋世宗十九年河決睢州野鷄崗四十四年
 河決沛之飛雲橋神宗五年河決崔鎮二十五
 年河決黃堍口懷宗十五年河決汴城大抵決
 口必在開封南北百里而被害之地淮三漕七
 後乃駸駸數病漕河焉蓋合大河以歸一淮物

不能兩大况水又泥淖多津驪二瀆之水行閔
 邊之途其必潰也明甚而兗州卑下齊魯瀕海
 黃河所向并幸漕河諸水盡瀉入海故河決之
 世陸則病水水則病涸發則病水去則病涸齊
 魯病水漕河病涸一隅病水全河病涸而說者
 謂河既欲自豫決充入漕達海何不盡浚豫充
 諸決地聽河北流過濟寧下臨清出直沽漕與
 河合漕不病竭淮與河分淮不病溢策至便也
 不知淮河浩瀚千里一瀉猶不能洩怒時思沸

湧。漕。水。千。步。百。折。委。紆。盤。曲。河。豈。能。按。轡。徐。行。
于。若。必。廢。漕。制。以。興。水。體。取。咽。喉。之。地。爲。尾。閘。
之。衝。必。無。幸。矣。故。治。河。之。道。古。無。上。策。史。冊。所。
載。不。過。三。說。曰。疏。曰。浚。曰。塞。塞。在。上。流。堙。谷。載。
流。是。也。疏。在。下。流。分。去。混。澤。是。也。浚。在。河。身。築。
堤。固。岸。使。之。安。行。是。也。疏。近。上。策。神。禹。北。播。九。
河。賈。讓。北。放。渤。海。棄。地。遷。民。費。以。鉅。萬。効。已。難。
言。之。近。世。以。來。浚。塞。兼。施。徐。有。貞。謂。水。平。後。可。
治。決。決。止。乃。可。濬。淤。此。先。塞。繼。浚。之。法。也。故。力。

築張秋金堤堅塞決口而徐濬漕河之淤水道
乃平劉大夏言河道不治乃修築隄防之功多
疏濬分殺之功少此先浚後塞之法也故力浚
賈魯河孫家渡殺水入淮又浚淤河出宿遷臺
州入淮後築長堤起豫達徐衝決遂止他如潘
季馴之不失故道不分濁流楊一魁之首開武
墩欠疏具壩皆良策也夫殷都帶河囂耿屢遷
武帝刑牲宣瓠時決終明之世河患時警未嘗
一歲沮運者浚塞之力也九河故道已不能修

○漕○河○一○綫○勢○不○能○廢○然○則○塞○浚○之○功○與○河○終○始○
○尚○其○借○鑒○于○茲○

(Faded text, likely bleed-through from the reverse side of the page)



